

Američki univerzitet u BiH uložio žalbu Opštinskom vijeću Tuzla

# Sporan konkurs za dodjelu zemljišta

**Ovdje se radi o pokušaju namještanja konkursa, dobro uigranoj ekipi, o razgranatoj hobotnici u općinskoj strukturi, kazao advokat Muhić**

Jasmina ŠARAC

TUZLA - Američki univerzitet u BiH (AU BiH) optužuje općinsku vlast da je konkurs za dodjelu zemljišta na Trgu slobode u Tuzli bio namješten, ali da je poništen nakon što su oni dali bolju ponudu od drugog kandidata, rečeno je na pres-konferenciji u četvrtak u ovoj visokoobrazovnoj ustanovi.

Dekan AU BiH Denis Prčić i advokat Faik Muhić

iznijeli su podatke o toku konkursne procedure i ukazali na namještanje dodjele atraktivne lokacije u centru Tuzle.

Njima je konkurentna bila firma "Tehnološki park Tuzla", registrovana mjesec uoči raspisivanja konkursa, vlasništvo Ede Delibegovića, inače sina Envera Delibegovića, bliskog čelnicima općine Tuzla. Međutim, AU BiH je ponudio 140.000 KM više nego oni, ali su obje

**AU BiH ponudio je 140.000 KM više, ali su obje ponude odbijene**

ponude odbijene, uz obrazloženje da nemaju reference za djelatnost naučno-tehnološki parkovi.

"Naučno-tehnološki parkovi u nomenklaturi djelatnosti u BiH ne postoje. Općina Tuzla može tražiti šta da se gradi na zemljištu, ali ne može da kaže ko će konkurisati i da određuje djelatnost onih koji konkuriraju. Ovdje se radi o pokušaju namještanja konkursa,

FOTO NIN



Denis Prčić i Faik Muhić na konferenciji za novinare

dobro uigranoj ekipi, o razgranatoj hobotnici u općinskoj strukturi, koja zna kako se to radi", istakao je advokat Muhić.

On je ukazao i na izmjenu prvobitne urbanističke saglasnosti za namjenu objekta na spornom trgu. Naime, po prvobitnoj odluci Općinskog vijeća Tu-

zla bilo je predviđeno da se gradi objekat za obrazovne, administrativne i slične poslove. To je, nakon registracije preduzeća "Tehnološki park Tuzla", čije je sjedište u objektu gdje se nalazi salon namještaja, izbačeno, a navedeno da namjena treba da bude naučno-tehnološki park.

Američki univerzitet u BiH uložio je žalbu Općinskom vijeću Tuzla zbog odbijanja ponuda za dodjelu sporne parcele.

"Očekujemo žestoku protureakciju, ali se nadamo da se pojedini iz SDP-a neće držati stranačke discipline. Ovo je prilika da pokažu koliko su demokrati", kazali su predstavnici AU BiH.

Prčić je je podsjetio da je načelnik Tuzle Jasmin Imamović obećao ambasadorima Vilijamu Montgomeriju, Klifordu Bondu i Daglasu Meklbejniju da će grad podržati AU BiH i da će odobriti da AU BiH uradi rekonstrukciju starog sjedišta općine Tuzla. No, to obećanje nije realizovano. Sa nadležnima u općini Tuzla jučer nismo uspjeli stupiti u kontakt.